

[Augsburg], 28. August 1556

An Johannes Oporinus

UB Basel, Fr. Gr. I 11, fol. 197r-v.  
 Steinmann Nr. 690.  
 Lit.: Husner S. 145, 150 (mit Auszug).

S. P. D. Quo minus petitionis tuae a D. Antonio Fuggero statim compos factus sis, illud in causa est, quod tu sumptus duorum tomorum supputasti, cum nunc de solo Zonara agatur, qui, vt arbitramur, vnum iustum tomum Nicephoro non multo maiorem, graece et latinè explebit. Nam mea versio totius Zonarae paginas meae scripturae cuiusmodi haec est, aut paulo laxioris (nam in quarta forma scripsi) non amplius 202 complectitur. Tu totidem folijs vt opinor et graeca et latina coniunges in ampla illa charta, aut saltem 230. Sed iudicium tuum erit, qui rectius ista aestimabis ex hoc tomo tertio, quem à Seb[astiano] Rosemblat Burtembachij genero accipies. qui est omnium maimus. Nam caeteros quaternis paginis superat. aestimato numero foliorum et sumptu vnius Zonarae (Nam de paralipomenis Choniatae et Pachymerij hoc tempore ne cogitandum quidem est) quamprimum ad Anto[nium] aut me scribito μετ' αἰτιολογίας καὶ σωφροσύνης ne senex iniquum postulari credens offendatur. Credo te semissem eius quod in binos tomos postulasti, in vnum impetraturum, vt tantum consequaris quantum postulasti, semisse et sumptuum et laborum detracto. Sin nos nostra supputatio fefellit: ἔλεγξον modò quamprimum. ego quantum in me erit, adiuuabo, ὅπως ἔσηται πάντα καλῶς.

D. Anto[nius] vult graecè et latinè e regione Zonaram imprimi, vtrum verò integris folijs an distinctis columnis, tui iudicij erit, modo chartae et characterum iusta sit magnitudo. cura quaeso vt specimen operis cum primum domum redieris, huc mittatur. Erit ista coniunctio e tua quoque re. Nam si pauca exempla graeca impresseris, sumptum non ferent. si multa, vix distrahes. Nam triplo plures latinum emptum volent. Mea nihil interest vtrum facias, sed patrono mos gerendus erit.

Idem ad Cal[endas] Martias anni 1557 opus Zonarae edi cupit. quod te curare tua interest. Ego antquam tu domum redieris, primum quoque tomum absoluero, et intra Cal[endas] Nouembris etiam secundum ad te mittam ἀν θεὸς ἐθέλη. Ad haec Mi D. Oporine, cum primo Augustano tabellario huc rescribito, vt interea toto negocio deliberato, et concluso, domum reuersus statim auspiceris et citra vllum impedimentum et dubitationem pergas.

Tomum quem accipies, post primam manum quater accuratè summa cum patientia et aerumna relegi, ac operam dedi, ne vllus apex esset deprauatus. sed sicubi per incogitantiam aut ἀοπασίαν lapsus sum, quaeso vt aut me in tempore admoneas, aut ipse corrigas. genus orationis est asperius, ἀνόμαλον καὶ ἀτακτον. Monachi salebras et praecipitia consecrari necesse habui, si mihi plano et recto itinere praecessisset, vestigia eius commodius et libentius secutus essem. Sed sic quoque sequenda fuerunt, ne planè a via aberrarem, si liberius expatiarer. Sed tu haec pro aequitate tua iudicabis. Maluissem τοὺς 15 ὥτορας conuertere si mei iuris fuisse. Vale ac quamprimum quam accuratiss[ime] de omnibus rebus et voluntate tua διαρρήδην scribito, vt pecunia mature ad te mitti possit. Nam puto inter te et D. Anto[nium] facile conuenturum.<sup>1</sup> Sin, quod absit, calamitas aliqua interuenerit: Monachum meum ad me remittes in tempore. quanquam iam non meus est, sed D. Antonij. 28 Augusti Anno 1556.

D[omino] meo Respub[lica] Ferrarij et Anthologia gratae fuerunt.

Hiero[nymus] Wolfius  
Tuus.

Velim te quoque scribere, quot exemplaria D. Antonio citra damnum tuum mittere possis aut velis, vt senex ad depromendos nummos fiat alacrior. non puto vltra 30 aut 20 desideraturum. Iterum vale.

<sup>1</sup>Am Rand ergänzt: De membranis nihil adhuc constitutum est. et vereor vt hic recte confiantur. Sed admonebo patronum, vt si cordi est, maturet.